

Recordando victimanan di e di Dos Guerra Mundial y nan sacrificio pa nos libertad



ORANJESTAD – Cu tur e elemento y protocol cu e ocasion merece, asina a celebra ayera tardi e ceremonia solem pa Conmemoracion di Mortonan di e Di Dos Guerra Mundial. Prome Minister Mike Eman, como hefe di Gobierno, a participa den esaki hunto cu Su Excelencia Gobernador Fredis Refunjol, President di Parlamento drs. Marisol Lopez-Tromp y Minister di Relacionnan Exterior

di Hulanda di bishita na Aruba, Bert Koenders, entre otro dignatario.

Minister President, den number di pueblo di Aruba, a haci un ofrenda floral na e monumento di Soldaat Desconoci ubica riba Adriaan Lacle Boulevard.

Tambe e mandatario a hiba un discurso caminda a pone enfasis riba amor pa prohimo y con esaki lo pone fin na conflictonan den mundo.

Historia ta recorda nos cu hopi dolor, cu ta solamente dialogo, atencion y tolerancia ta e miho reaccion y posicion pa elimina diferencianan di opinion. “Amor pa prohimo ta e solucion,” Eman a expresa.

Naturalmente, el a haci mencion di nos heroe ‘Boy Ecury’ y a duna elogio na e Arubianonan cu a participa den e di Dos Guerra Mun-



dial, di cual algun ainda nos tin e dicha di tin na bida y tabata presente na e ceremonia. Compatriotanan cu a duna un sacrificio hopi grandi pa nos por biba den libertad, un libertad cu nos mester sa di balora tur dia.

E ceremonia aki ta wordo teni anualmente riba dia 4 di mei. A celebra e aña aki e di 70 aniversario di fin di guerra. □